



Cinzia Regensburger ha organisà ün arrandschamaint da Viva la musica i'l hotel Scuol Palace a favur da la Büvetta a Nairs. Il cumanzamaint a fat Paulin Nuotclà. fotografias: Dominik Täuber

Tuns e suns a favur da la Büvetta

Ün'ottantina da chantaduras e musicists indigens s'han chattats l'ultima dumengia i'l Hotel Scuol Palace. E quai na per dar ün concert per l'agen bön, dimpersè per ramassar raps a favur da la sanaziun da la Büvetta a Nairs sper Scuol.

Prosma dumengia, ils 19 avrigl decidan las votantas ed ils votants dal cumün da Scuol davart l'avegnir da la Büvetta a Nairs sper Scuol. L'edifiz ch'i'd es tenor l'Uffizi federal da cultura da valur significhanta a nivel naziunal, douvra ur-

giaintamaing üna sanaziun. Planisats sun cuosts totals da raduond 18 milliuns francs per quista sanaziun. Da quels stuvsess il cumün da Scuol surtour 3,7 milliuns francs.

Per far attent a la votaziun e ramassar raps a favur da la società Pro Büvetta Tarasp, ha la musicista da Scuol, Cinzia Regensburger organisà la dumengia passada i'l rom da seis concerts da «Viva la Musica» ün concert da benefizi i'l Hotel Scuol Palace.

Dürant il decuors dal davomezdi e la saira han ils raduond 200 preschaints e preschaintas pudü giodair ed impustüt tadlar ün'ottantina da chantaduras e musicists indigens. Üna dumengia in cumpagnia cun tuns e suns davent da

musica classica, musica populara, al chant coral, sur jazz, blues e pop fin a musica da trategnimaint, e quai pel bön ed avegnir da la Büvetta a Nairs.

Da las 14.00 fin las 20.00 ha gnü lö il concert da benefiz. Il cumanzamaint ha fat Paulin Nuotclà. Ad el sun seguits Ernst Bromeis, Cinzia Regensburger cun differentas scolaras da la scoula da musica Engiadina Bassa, Isabella Kania, il cor dal proget Scuol Classics 2026 chi preschainta in gün Carmina Burana illa halla Gurlaina a Scuol, il Coro viril Engiadina Bassa, e las gruppas Che Bo, Ils 7 Nanins e Mi'Amia. La sairada es lura ida a fin cun musica da DJ Mendu.

Dario Müller/fmr



Ernst Bromeis, ils 7 Nanins, differentas scolaras da la Scoula da musica Engiadina Bassa Val Müstair, il cor indigen dal proget Carmina Burana da Scuol Classics e Mi'Amia sun seguits a l'invid musical.